

PRIJEDLOG

Na osnovu člana 17. , a u vezi sa članom 23. Zakona o Vijeću ministara BiH („Službeni glasnik BiH“ br. 30/03, 42/03, 81/06, 76/07, 81/07, 94/07 i 24/08) i članom 18. Zakona o ministarstvima i drugim organima uprave Bosne i Hercegovine („Službeni glasnik BiH“ br. 5/03, 42/03, 26/04, 42/04, 45/06, 88/07, 35/09, 59/09 i 103/09), Vijeće ministara BiH, na _____ sjednici održanoj dana _____ 2016. godine, donijelo je

ODLUKU O SISTEMU KOORDINACIJE PROCESA EVROPSKIH INTEGRACIJA U BOSNI I HERCEGOVINI

POGLAVLJE I - OPŠTE ODREDBE

Član 1. (Predmet)

Odlukom o sistemu koordinacije procesa evropskih integracija u BiH (u daljem tekstu: Odluka), definišu se institucionalni i operativni sistem i način ostvarivanja koordinacije institucija u BiH na provođenju aktivnosti vezanih za proces integrisanja BiH u Evropsku uniju, zajednička tijela u okviru sistema koordinacije, njihov sastav, nadležnosti i međusobni odnosi.

Član 2. (Koordinacija procesa evropskih integracija)

(1) Koordinacija procesa evropskih integracija podrazumijeva aktivnosti koje se provode u cilju obezbjeđenja što većeg stepena usklađenosti i koherentnosti u radu institucija svih nivoa vlasti u BiH vezanom za izvršenje ugovornih obaveza iz Sporazuma o stabilizaciji i pridruživanju između Evropskih zajednica i njihovih država članica i BiH („Službeni glasnik BiH – Međunarodni ugovori“, br. 10/08) (u daljem tekstu Sporazum o stabilizaciji i pridruživanju), kao i drugih obaveza iz procesa evropskih integracija. Sistemom koordinacije uređuje se i način ostvarivanja komunikacije između institucija u BiH, sa ciljem obezbjeđenja i iznošenja usaglašenog stava ispred BiH u komunikaciji sa institucijama Evropske unije.

(2) Koordinacija procesa evropskih integracija u BiH zasniva se na načelima poštivanja postojeće unutrašnje pravne i političke strukture u BiH i zaštite ustavima definisanih nadležnosti svih nivoa vlasti i njihovih institucija u pojedinim

oblastima obuhvaćenim procesom evropskih integracija, obezbjeđenja vidljivosti, te odgovornosti svih nivoa vlasti za blagovremeno i djelotvorno ispunjavanje obaveza iz procesa evropskih integracija iz njihove nadležnosti.

(3) Koordinacija procesa evropskih integracija u BiH ostvaruje se na horizontalnom (koordinacija unutar jednog nivoa organizacije vlasti) i vertikalnom nivou (koordinacija između različitih nivoa organizacije vlasti). U skladu sa stavom (2) ovog člana Odluke, strukture i modalitete ostvarenja horizontalne koordinacije svaki nivo vlasti uređuje samostalno, u skladu sa svojim ustavnim poretkom i upravno – pravnim specifičnostima, kapacitetima i potrebama, te oni ne predstavljaju predmet ove odluke.

(4) U cilju djelotvornog provođenja vertikalne koordinacije procesa evropskih integracija u BiH, uspostavljaju se sljedeća zajednička tijela:

- a) Kolegijum za evropske integracije
- b) Ministarske konferencije
- c) Komisija za evropske integracije
- d) Radne grupe za evropske integracije

(5) S ciljem nadzora nad provođenjem Sporazuma o stabilizaciji i pridruživanju i osiguranjem funkcionalne povezanosti između tijela unutrašnjeg sistema koordinacije procesa evropskih integracija u BiH te djelovanja i zastupanja usaglašenog „jednog glasa“ ispred BiH, u sastavu zajedničkih tijela između BiH i Evropske unije ispred BiH djeluju:

- a) Stalna delegacija BiH u okviru Savjeta za stabilizaciju i pridruživanje;
- b) Stalna delegacija BiH u okviru Odbora za stabilizaciju i pridruživanje;
- c) Stalna delegacija BiH u okviru pododborā za stabilizaciju i pridruživanje;
- d) stalne delegacije BiH u okviru drugih zajedničkih tijela između BiH i Evropske unije koja se uspostavljaju u skladu sa Sporazumom o stabilizaciji i pridruživanju.

Prijedlog člana 3. sukladno dogovoru na sastanku održanom 31. 7. 2016. između predsjedatelja Predsjedništva BiH, predsjedatelja VM BiH, predsjednika RS i entitetskih premijera

Član 3.
(Način odlučivanja)

(1) Način odlučivanja u svim tijelima koja se uspostavljaju u skladu sa članom 2. stav (4) ove odluke je konsenzus. Institucije na svim nivoima vlasti u BiH obavezne su obezbijediti učešće svojih predstavnika na sjednicama tijela koja se uspostavljaju u skladu sa članom 2. stav (4) ove odluke, pod uslovom da se pozivi za sjednice obavezno dostavljaju svim članovima tijela najkasnije pet (5) radnih dana prije datuma održavanja sjednice.

(2) Kvorum za održavanje sastanaka i usvajanje odluka u tijelima iz člana 2. stav (4) ove odluke obavezno čine ovlašteni predstavnici: (a) predstavnik Savjeta ministara, (b) predstavnik Vlade Republike Srpske i (c) predstavnici Vlade Federacije BiH i kantona, a u skladu sa ustavnim nadležnostima za materiju koja se razmatra na sjednici, odnosno koja je predmet odluke.

(3) Sve odluke usvojene u različitim tijelima sistema koordinacije mogu biti preispitane pred višim tijelom u sistemu koordinacije u roku od deset (10) dana od njihovog donošenja, a od strane ovlaštenih predstavnika Savjeta ministara, predstavnika Vlade Federacije BiH i Vlade Republike Srpske.

(4) U slučajevima kada neko od tijela u sistemu koordinacije ne usaglasi poziciju povodom određenog pitanja, isto će biti upućeno višem nivou u sistemu koordinacije zaključno sa Kolegijumom za evropske integracije, koji se sastaje i djeluje u skladu sa članom 4.

Prijedlog Kabineta ministra finansija i trezora BiH i zamjenika predsjedavajućeg Savjeta ministara

Član 3. (Način odlučivanja)

(1) Način odlučivanja u svim tijelima koja se uspostavljaju u skladu sa članom 2. stav (4) ove odluke je konsenzus. Institucije na svim nivoima vlasti u BiH obavezne su obezbijediti učešće svojih predstavnika na sjednicama tijela koja se uspostavljaju u skladu sa članom 2. stav (4) ove odluke, pod uslovom da se pozivi za sjednice obavezno dostavljaju svim članovima tijela najkasnije pet (5) radnih dana prije datuma održavanja sjednice.

(2) Kvorum za održavanje sastanaka i usvajanje odluka u tijelima iz člana 2. stav (4) ove odluke obavezno čine ovlašteni predstavnici: (a) predstavnik Savjeta ministara, (b) predstavnik Vlade Republike Srpske, (c) predstavnik Vlade Federacije BiH, (d) predstavnici svih deset (10) vlada kantona, (e) predstavnik Vlade Distrikta Brčko BiH, a u skladu sa ustavnim nadležnostima za materiju koja se razmatra na sjednici, odnosno koja je predmet odluke.

(3) Sve odluke usvojene u različitim tijelima u sistemu koordinacije mogu biti preispitane pred višim tijelom u sistemu koordinacije u roku od deset (10) dana od njihovog donošenja, a od strane ovlaštenih predstavnika Savjeta ministara, predstavnika Vlade Federacije BiH, predstavnika Vlade Republike Srpske, predstavnika svih deset (10) vlada kantona i predstavnika Vlade Distrikta Brčko BiH.

(4) U slučajevima kada neko od tijela u sistemu koordinacije ne usaglasi poziciju povodom određenog pitanja, isto će biti upućeno višem nivou u sistemu

koordinacije zaključno sa Kolegijumom za evropske integracije, koji se sastaje i djeluje u skladu sa članom 4. ove odluke.

POGLAVLJE II - KOLEGIJUM ZA EVROPSKE INTEGRACIJE

Član 4.

(Kolegijum za evropske integracije)

(1) Kolegijum za evropske integracije je najviše političko tijelo u sistemu koordinacije procesa evropskih integracija u BiH, koje obezbjeđuje usaglašenost stavova po ključnim, strateškim i političkim pitanjima u oblasti evropskih integracija te, u krajnjoj instanci, otklanja eventualne zastoje u ispunjavanju obaveza iz procesa integracije BiH u Evropsku uniju.

(2) Kolegijum za evropske integracije uspostavlja se konstitutivnom sjednicom koju saziva predsjedavajući Kolegijuma za evropske integracije u dogovoru sa zamjenicima predsjedavajućeg Kolegijuma za evropske integracije, najkasnije u roku od dvadeset (20) dana od dana stupanja ove odluke na snagu.

(3) Članovi Kolegijuma za evropske integracije su:

- a) predsjedavajući Savjeta ministara
- b) zamjenici predsjedavajućeg Savjeta ministara
- c) predsjednik Vlade Federacije BiH
- d) dva člana Vlade Federacije BiH
- e) predsjednik Vlade Republike Srpske
- f) dva člana Vlade Republike Srpske
- g) gradonačelnik Distrikta Brčko BiH
- h) predsjednici vladâ kantona.

(4) Predsjedavajući Savjeta ministara, predsjednici vladâ entiteta i, kantona te i gradonačelnik Brčko Distrikta BiH, u slučaju spriječenosti, mogu ovlastiti člana Savjeta ministara odnosno člana vlada entiteta, kantona i Brčko Distrikta BiH, da u punom kapacitetu i sa punim pravima i obavezama uzme učešće na sastanku Kolegijuma, izuzev prava predsjedavanja. U slučaju zastupanja, predsjedavajući Savjeta ministara, predsjednici vladâ entiteta i, kantona te i gradonačelnik Brčko Distrikta BiH dužni su o tome u pisanoj formi izvijestiti sve članove Kolegijuma za evropske integracije najkasnije 24 sata prije održavanja sjednice Kolegijuma za evropske integracije.

(5) U skladu sa iskazanom potrebom i u zavisnosti od pitanja koja su predmet razmatranja Kolegijuma, njegovoj sjednici na usaglašen poziv predsjedavajućeg i zamjenika predsjedavajućeg Kolegijuma, mogu prisustvovati i drugi resorno nadležni ministri, odnosno rukovodioci institucija svih nivoa vlasti u BiH u svojstvu izvjestioca prema tematskim oblastima, odnosno tačkama dnevnog reda i

u skladu sa ustavnim nadležnostima za oblast koja se razmatra. Pozvani izvjestioci iz Savjeta ministara, vladâ entiteta i, kantona te i Brčko Distrikta BiH ne raspolažu pravom glasa u Kolegijumu.

(6) Funkciju predsjedavajućeg Kolegijuma za evropske integracije obavlja predsjedavajući Vijeća ministara BiH, a funkciju njegovih zamjenika predsjednici vladâ entiteta. Predsjedavajući Kolegijuma zakazuje sastanke uz prethodnu saglasnost njegovih zamjenika.

(7) Sjednice Kolegijuma za evropske integracije saziva predsjedavajući Kolegijuma na vlastitu ili inicijativu bilo kojeg drugog člana Kolegijuma. U slučaju spriječenosti predsjedavajućeg, sjednicom Kolegijuma predsjedavaju njegovi zamjenici. Sjednice Kolegijuma za evropske integracije održavaju se najmanje dva (2) puta godišnje, a po potrebi i češće. Poziv za sjednicu Kolegijuma obavezno se dostavlja svim članovima Kolegijuma najkasnije pet (5) radnih dana prije dana održavanja sjednice.

(8) Članovi Kolegijuma su obavezani da prezentuju usaglašen stav ispred nivoa vlasti kojeg predstavljaju.

(9) Kolegijum će formirati Savjetodavno tijelo sastavljeno od savjetnika za evropske integracije čija je uloga da pruža političko – stručnu podršku radu Kolegijuma i ministarskim konferencijama, obezbjeđuje komunikaciju između političkog i tehničkog nivoa u sistemu koordinacije, te priprema prijedloge mogućih rješenja za otklanjanje zastoja koji eventualno nastanu u ispunjavanju obaveza BiH u oblasti evropskih integracija. Svaki član Kolegijuma će imenovati po jednog predstavnika u Savjetodavno tijelo. Način rada i sastav Savjetodavnog tijela biće regulisan poslovnikom o radu Kolegijuma.

(10) Funkciju sekretarijata, odnosno sekretara Kolegijuma obavlja Direkcija za evropske integracije BiH.

(11) Kolegijum za evropske integracije donosi poslovnik o radu kojim se regulišu sva tehnička pitanja vezana za način njegovog rada. Nacrt poslovnika o radu Kolegijuma za evropske integracije izrađuje Direkcija za evropske integracije BiH i dostavlja ga svim članovima Kolegijuma najkasnije u roku od 15 dana od dana stupanja ove odluke na snagu.

POGLAVLJE III – MINISTARSKE KONFERENCIJE

Član 5.

(Ministarske konferencije)

(1) Ministarske konferencije su tijela u sistemu koordinacije procesa evropskih integracija u BiH čijim djelovanjem se obezbjeđuje sveobuhvatan i ujednačen

pristup nadležnih institucija sa svih nivoa vlasti u pojedinim sektorskim oblastima obuhvaćenim procesom evropskih integracija.

(2) Ministarske konferencije se sastoje od resorno nadležnih ministara iz Savjeta ministara, vlada entiteta, vlada kantona i predstavnika Vlade Distrikta Brčko BiH, u skladu sa njihovim ustavnim nadležnostima za materiju koja se razmatra ili za oblast za koju je ministarska konferencija formirana.

(3) Ministarske konferencije doprinose prevladavanju eventualnih zastoja u ispunjavanju obaveza BiH u procesu evropskih integracija, te procesu programiranja pomoći Evropske unije, a koji nisu mogli biti riješeni u okviru tehničkih i operativnih tijela u sistemu koordinacije. S ciljem realizacije obaveza koje proističu iz Sporazuma o stabilizaciji i pridruživanju, ministarske konferencije definišu zajedničke smjernice i platforme za djelovanje operativnih i tehničkih tijela u sistemu koordinacije u pojedinačnim sektorskim oblastima obuhvaćenim procesom pristupanja Evropskoj uniji.

(4) Na svojoj prvoj sjednici Kolegij za evropske integracije pokreće inicijativu za uspostavljanjem sektorski koncipiranih ministarskih konferencija u skladu sa poglavljima pravne tekovine Evropske unije, te u skladu sa ustavnim nadležnostima pojedinih nivoa vlasti za oblast za koju se ministarska konferencija uspostavlja. Najkasnije u roku od dvadeset (20) dana od pokretanja inicijative za uspostavljanjem ministarske konferencije, Savjet ministara, entitetske vlade, vlada Brčko Distrikta i kantonalne vlade su dužne usvojiti jednoobrazno Uputstvo kojim se uređuje predmet djelovanja ministarske konferencije, kao i međusobni odnosi, prava i obaveze u okviru ministarske konferencije koje se uspostavljaju.

(5) Jednoobrazno Uputstvo kojim se definiše uspostavljanje ministarske konferencije u pojedinim sektorskim oblastima, te uređuju pitanja iz stava (4) ovog člana, izrađuje Direkcija za evropske integracije BiH najkasnije u roku od deset (10) radnih dana od dana stupanja ove odluke na snagu, te isto dostavlja Kolegijumu za evropske integracije na prethodno odobravanje, odnosno potom prosljeđuje Savjetu ministara i vladama entiteta, kantona i Distrikta Brčko BiH iz stava (4) ovoga člana na konačno usvajanje.

(6) Predsjedavajućeg ministarske konferencije i njegova dva zamjenika biraju njeni članovi u skladu sa odredbama člana 3. na prvoj sjednici ministarske konferencije.

(7) Sjednice ministarskih konferencija održavaju se po potrebi, u skladu sa dinamikom rada tehničkih i operativnih tijela u sistemu koordinacije procesa evropskih integracija u BiH. Sjednicu ministarske konferencije, na sopstvenu ili inicijativu bilo kojeg njenog člana, saziva njen predsjedavajući. U slučaju odsustva predsjedavajućeg, sjednicu mogu sazvati i sjednicom kopredsjedavati zamjenici predsjedavajućeg. Poziv za sjednicu ministarske konferencije obavezno se dostavlja svim članovima ministarske konferencije najkasnije pet (5) radnih dana prije dana održavanja sjednice.

(8) U slučaju spriječenosti, član ministarske konferencije će ovlastiti svog zastupnika koji će, u punom kapacitetu, uzeti učešće u radu ministarske konferencije. O ovakvim situacijama, član ministarske konferencije dužan je pisanim putem upoznati predsjedavajućeg i zamjenika predsjedavajućeg ministarske konferencije najkasnije dva (2) dana prije održavanja sastanka ministarske konferencije. Ovlašteni zastupnik člana ministarske konferencije ne raspolaže pravom predsjedavanja na ministarskoj konferenciji.

(9) U slučaju da ministarska konferencija ne može zauzeti stav po određenom pitanju, predsjedavajući konferencije dato pitanje prosljeđuje Kolegijumu za evropske integracije da usaglasi rješenje spornog pitanja. Upućeni zahtjev će sadržavati obrazloženje spornog pitanja i prijedloge mogućih modela za njegovo rješavanje koji su razmatrani na sjednici ministarske konferencije.

(10) Funkciju sekretara ministarske konferencije obavlja imenovana osoba iz institucije predsjedavajućeg, u saradnji sa Direkcijom za evropske integracije BiH.

(11) Sva ostala tehnička pitanja vezana za način rada ministarskih konferencija biće regulisana jedinstvenim poslovnikom o radu kojeg, uz prethodno odobrenje Kolegijuma za evropske integracije, usvaja svaka pojedinačna ministarska konferencija na svojoj konstitutivnoj sjednici. Direkcija za evropske integracije BiH dužna je nacrt jedinstvenog poslovnika o radu ministarskih konferencija Kolegijumu za evropske integracije dostaviti najkasnije u roku od trideset (30) dana od dana stupanja ove odluke na snagu.

POGLAVLJE IV – KOMISIJA ZA EVROPSKE INTEGRACIJE

Član 6.

(Komisija za evropske integracije)

(1) Komisija za evropske integracije (u daljem tekstu: Komisija) je tijelo zaduženo za opštu, tehničku, operativnu i metodološku koordinaciju u cilju obezbjeđenja što višeg stepena sveobuhvatnosti u radu nadležnih institucija sa svih nivoa vlasti u BiH u oblasti evropskih integracija.

(2) U ostvarivanju svog djelokruga rada, Komisija posebno:

- a) prati ispunjavanje obaveza iz Sporazuma o stabilizaciji i pridruživanju, kao i drugih obaveza iz procesa evropskih integracija;
- b) ostvaruje saradnju sa članovima Stalne delegacije BiH u okviru Odbora za stabilizaciju i pridruživanje u kontekstu pripreme i učešća članova Stalne delegacije na sastancima Odbora, te osiguranja jedinstvenih stavova koje su članovi Stalne delegacije BiH na sastancima Odbora obavezni zastupati;
- c) na opštem nivou, koordiniše i usmjerava rad i radnih grupa za evropske integracije;

- d) raspravlja o svim otvorenim pitanjima i utvrđuje smjernice rada u procesu evropskih integracija na operativno-tehničkom i metodološkom nivou;
- e) ostvaruje blisku saradnju sa ministarskim konferencijama po svim otvorenim pitanjima u procesu evropskih integracija.

Član 7.
(Sastav Komisije)

(1) Stalni članovi Komisije su:

- a) direktor Direkcije za evropske integracije BiH
- b) po jedan predstavnik vladâ entiteta koji je ispred vlade entiteta zadužen za poslove koordinacije procesa evropskih integracija;
- c) po jedan predstavnik vladâ kantona, koji je ispred vladâ kantona zadužen za poslove koordinacije procesa evropskih integracija;
- d) jedan predstavnik vlade Brčko Distrikta koji je ispred vlade Brčko Distrikta zadužen za poslove koordinacije procesa evropskih integracija;
- e) imenovano lice ispred Direkcije za evropske integracije BiH, u svojstvu sekretara Komisije.

(2) Dopunski članovi Komisije su:

- a) predsjedavajući radnih grupa za evropske integracije;
- b) po jedno imenovano lice ispred institucija na nivou BiH, entiteta, kantona i Distrikta Brčko BiH koje su zadužene za davanje mišljenja, odnosno ocjenu usklađenosti akata sa pravnom tekovinom Evropske unije;
- c) po jedan član Koordinacionog odbora IPA sa nivoa BiH, entiteta, kantona i Distrikta Brčko BiH;
- d) predstavnici drugih institucija sa svih nivoa vlasti u BiH, u skladu sa pitanjima koja su predmet razmatranja Komisije;
- e) predstavnici nevladinog sektora i akademske zajednice, u skladu sa pitanjima koja su predmet razmatranja Komisije.

(3) Dopunski članovi u radu Komisije učestvuju po pozivu predsjedavajućeg, a na osnovu prethodno obezbjeđene saglasnost svih njenih stalnih članova.

(4) Svi nadležni nivoi vlasti u BiH će najkasnije u roku od deset (10) dana od dana stupanja na snagu ove odluke Direkciji za evropske integracije BiH dostaviti imenovanja svojih predstavnika u Komisiji za evropske integracije.

(5) Savjet ministara donosi odluku o uspostavljanju Komisije za evropske integracije, na prijedlog Direkcije za evropske integracije BiH, a nakon dostavljanja imenovanja predstavnika svih nivoa vlasti u BiH u skladu sa stavom (4) ovog člana, najkasnije u roku od dvadeset (20) dana od dana stupanja ove odluke na snagu.

(6) Stručnu i tehničku podršku radu Komisije pruža Direkcija za evropske integracije BiH.

Član 8. (Način rada Komisije)

(1) Sastanke Komisije saziva predsjedavajući, na sopstvenu ili inicijativu bilo kojeg njenog stalnog člana.

(2) Komisija se sastaje po potrebi, a najmanje jednom u dva mjeseca.

(3) Funkciju predsjedavajućeg Komisije za evropske integracije obavlja direktor Direkcije za evropske integracije BiH, a funkciju njegovih zamjenika predstavnici vlada entiteta koji su zaduženi za poslove koordinacije procesa evropskih integracija. U slučaju spriječenosti predsjedavajućeg, sjednicom Komisije predsjedavaju njegovi zamjenici. Poziv za sjednice se obavezno dostavlja svim stalnim članovima Komisije najkasnije pet (5) radnih dana prije dana održavanja sjednice Komisije za evropske integracije.

(4) Funkciju sekretara vrši imenovano lice iz Direkcije za evropske integracije BiH.

(5) U slučaju spriječenosti, stalni član Komisije za evropske integracije može imenovati zamjenika koji će, u punom kapacitetu izuzev prava predsjedavanja, uzeti učešće na sastanku Komisije. Stalni član je o tome dužan pisanim putem obavijestiti predsjedavajućeg i zamjenike predsjedavajućeg Komisije za evropske integracije najkasnije dva (2) dana prije održavanja sastanka Komisije.

(6) Komisija za evropske integracije usvojiće poslovnik o radu kojim će biti regulisana sva tehnička pitanja vezana za njen rad. Direkcija za evropske integracije dostaviće Komisiji za evropske integracije nacrt njenog poslovnika o radu najkasnije trideset (30) dana od dana stupanja ove odluke na snagu.

POGLAVLJE V – RADNE GRUPE ZA EVROPSKE INTEGRACIJE

Član 9. (Radne grupe za evropske integracije)

(1) Radne grupe za evropske integracije (u daljem tekstu: radne grupe) predstavljaju operativna tijela u sistemu koordinacije koja djeluju u skladu sa smjernicama koje definiše Komisija za evropske integracije.

(2) Radne grupe se uspostavljaju u skladu sa pravnom tekovinom Evropske unije, te u skladu sa tematskim poglavljima i članovima Sporazuma o stabilizaciji i pridruživanju.

(3) Radne grupe čine predstavnici nadležnih institucija sa svih nivoa vlasti u BiH, u skladu sa njihovim ustavnim nadležnostima za oblasti za koju se radne grupe uspostavljaju.

(4) Inicijalnu identifikaciju nadležnih institucija sa svih nivoa vlasti u BiH čiji će predstavnici učestvovati u radu radnih grupa sačinjava Komisija za evropske integracije, te istu prosljeđuje nadležnim nivoima vlasti u BiH s ciljem potvrđivanja te identifikacije.

(5) Imenovanje svojih članova radnih grupa vrše identifikovane nadležne institucije sa svih nivoa vlasti u BiH, te isto prosljeđuju Komisiji za evropske integracije na konačno objedinjavanje liste imenovanih predstavnika u radnim grupama.

(6) Direkcija za evropske integracije BiH, nakon zaprimljenih imenovanja iz stava (5) ovog člana, dostavlja prijedlog Savjetu ministara koji donosi odluku o uspostavljanju radnih grupa za evropske integracije najkasnije u roku 40 dana od stupanja na snagu ove odluke.

(7) U zavisnosti od potreba rada radne grupe, predsjedavajući radne grupe, uz saglasnost njegovih zamjenika, može pozvati predstavnike drugih institucija sa svih nivoa vlasti u BiH, nevladinih organizacija, naučne i stručne radnike i sve druge koje nisu njeni članovi da učestvuju u njenom radu.

(8) Radne grupe zadužene su za:

a) tehničku finalizaciju pisanog materijala kojeg institucije u BiH izrađuju za potrebe informisanja Evropske komisije i drugih institucija Evropske unije, te tehničku finalizaciju drugih materijala koji proizilaze iz obaveza prema Sporazumu o stabilizaciji i pridruživanju i u procesu evropskih integracija;

b) participaciju u procesu programiranja sredstava pomoći Evropske unije, primarno u kontekstu identifikacije potreba za osiguranjem finansijske i tehničke podrške Evropske unije institucijama u BiH u realizaciji njihovih obaveza u realizaciji evropskog integracionog procesa;

c) identifikaciju potrebe za prevođenjem pravne tekovine Evropske unije, u saradnji sa institucijama sa svih nivoa vlasti koje se bave procesom prevođenja u oblasti evropskih integracija;

d) identifikaciju potrebe za organizovanjem obuka i edukacija u pojedinačnim oblastima ili pitanjima pravne tekovine Evropske unije, u saradnji sa institucijama sa svih nivoa vlasti zaduženim za poslove organizacije i koordinacije procesa obuka i edukacija;

e) razmjenu pozitivnih iskustava i dobre prakse između resorno nadležnih institucija sa svih nivoa vlasti u cilju efikasne realizacije obaveza iz procesa evropskih integracija;

f) u okviru pretpristupnih pregovora, radne grupe, uz njihovo kadrovsko jačanje, vršiće funkciju pregovaračkih timova ispred BiH po pojedinačnim oblastima pravne tekovine Evropske unije;

g) radne grupe svojim djelovanjem ni na koji način ne mogu nadomjestiti nadležne institucije sa svih nivoa vlasti u ispunjavanju obaveza BiH u procesu evropskih integracija.

Član 10.

(Organizacija i način rada radnih grupa)

(1) Listu kandidata predsjedavajućih radnih grupa, na nivou pomoćnika ministra ili rukovodioca, odnosno zamjenika rukovodioca institucije, kao i njegova dva zamjenika, sačinjava Komisija za evropske integracije, vodeći računa o ustavnim nadležnostima pojedinih institucija sa svih nivoa vlasti u oblastima i pitanjima kojima se pojedine radne grupe bave, te vidljivosti i odgovornosti svih nivoa vlasti u procesu evropskih integracija. Direkcija za evropske integracije BiH, listu koju potvrdi Komisija za evropske integracije, dostavlja Savjetu ministara u formi prijedloga na usvajanje. Rok za imenovanje predsjedavajućih i zamjenika predsjedavajućih radnih grupa je 40 dana od dana stupanja na snagu ove odluke.

(2) Sastanke radnih grupa, na vlastitu ili inicijativu bilo koja njena tri člana, saziva predsjedavajući. U slučaju spriječenosti predsjedavajućeg, sastanak radne grupe sazivaju i istim predsjedavajućem njegovi zamjenici. Poziv za sjednice obavezno se dostavlja svim članovima radne grupe najkasnije pet (5) radnih dana prije dana održavanja sjednice.

(3) Funkciju sekretara radnih grupa obavlja imenovana osoba iz institucije predsjedavajućeg, u saradnji sa Direkcijom za evropske integracije BiH.

(4) U slučaju da radna grupa ne može postići konsenzus po određenom pitanju, predsjedavajući radne grupe ili njegovi zamjenici upućuju Komisiji za evropske integracije zahtjev da usaglasi rješenje za sporno pitanje. Upućeni zahtjev će sadržavati obrazloženje spora i prijedloge mogućih modela za njegovo rješavanje koji su razmatrani na sjednici radne grupe.

(5) Komisija za evropske integracije usvojiće jedinstveni poslovnik o radu kojim će biti regulisana sva tehnička pitanja vezana za rad radnih grupa za evropske integracije. Direkcija za evropske integracije dostaviće Komisiji za evropske integracije nacrt jedinstvenog poslovnika o radu najkasnije 40 dana od dana stupanja ove odluke na snagu.

POGLAVLJE VI – STALNE DELEGACIJE BIH U OKVIRU ZAJEDNIČKIH TIJELA BIH I EVROPSKE UNIJE ZA NADGLEDANJE PRIMJENE SPORAZUMA O STABILIZACIJI I PRIDRUŽIVANJU

Član 11.

(1) U skladu sa rješenjima Sporazuma o stabilizaciji i pridruživanju, u okviru zajedničkih tijela između BiH i Evropske unije djeluju:

- a) Stalna delegacija BiH u okviru Savjeta za stabilizaciju i pridruživanje;
- b) Stalna delegacija BiH u okviru Odbora za stabilizaciju i pridruživanje;
- c) Stalna delegacija BiH u okviru pododbora za stabilizaciju i pridruživanje;
- d) stalne delegacije BiH u okviru drugih zajedničkih tijela između BiH i Evropske unije koja se uspostavljaju u skladu sa Sporazumom o stabilizaciji i pridruživanju;

(2) Članove stalnih delegacija BiH u zajedničkim tijelima BiH i Evropske unije iz stava (1) ovog člana utvrđuje Savjet ministara zasebnom odlukom najkasnije u roku od trideset (30) dana od dana stupanja na snagu ove odluke, u skladu sa odredbama Sporazuma o stabilizaciji i pridruživanju, te vodeći računa o ustavnim nadležnostima pojedinih nivoa vlasti u BiH u oblastima koja su predmet razmatranja zajedničkih tijela, kao i o potrebi obezbjeđenja odgovarajuće funkcionalne povezanosti između tijela unutrašnjeg sistema koordinacije procesa evropskih integracija u BiH, s jedne, te djelovanja i zastupanja usaglašenog „jednog glasa“ ispred BiH u okviru zajedničkih tijela BiH i Evropske unije, s druge strane.

(3) U skladu sa rješenjima stava (2) ovog člana:

(3.1) Članovi Stalne delegacije BiH u okviru Savjeta za stabilizaciju i pridruživanje su imenovani predstavnicima članovi Savjeta ministara;

(3.2) Članovi Stalne delegacije BiH u okviru Odbora za stabilizaciju i pridruživanje su stalni članovi Komisije za evropske integracije navedeni u članu 7(1), predsjedavajući i zamjenici predsjedavajućeg u stalnim delegacijama ispred BiH u tijelima navedenim u stavu (1)(c) i (d) ovog člana, te druga imenovana lica koje utvrđuje Savjet ministara zasebnom odlukom. Predsjedavajući delegacije ispred BiH u Odboru za stabilizaciju i pridruživanje će biti utvrđen u skladu sa stavom (2) ovog člana, a na osnovu usaglašenog prijedloga članova Odbora.

(3.3) Članovi stalnih delegacija BiH u okviru pododborā za stabilizaciju i pridruživanje i drugih tijela koja se uspostavljaju u skladu sa Sporazumom o stabilizaciji i pridruživanju su predsjedavajući i zamjenici predsjedavajućih radnih grupa za evropske integracije koje se bave pitanjima obuhvaćenim radom sektorski

koncipiranih pododбора, odnosno drugih tijela uspostavljenih na osnovu Sporazuma o stabilizaciji i pridruživanju.

(4) Sva tehnička pitanja vezana za način rada predstavnika BiH u zajedničkim tijelima BiH i Evropske unije iz člana 11 (1) ove odluke regulisana su zajedničkim poslovnicima o radu zajedničkih tijela između BiH i Evropske unije.

(5) Članovi stalnih delegacija BiH u zajedničkim tijelima BiH i Evropske unije iz člana 11 (1) Odluke dužni su na sastancima zajedničkih tijela zastupati i prezentovati isključivo stavove i pozicije definisane u okviru tijela sistema koordinacije procesa evropskih integracija u BiH.

POGLAVLJE VII – OSTVARIVANJE KOMUNIKACIJE U OBLASTI EVROPSKIH INTEGRACIJA

Član 12.

(Komunikacija sa institucijama Evropske unije)

(1) Direkcija za evropske integracije BiH djeluje kao stručno i tehničko – operativno tijelo koje ostvaruje komunikaciju sa Evropskom komisijom i Delegacijom Evropske unije u BiH za potrebe procesa evropskih integracija. Pri realizaciji ove komunikacije, Direkcija ostvaruje blisku saradnju i blagovremeno informiše koordinirajuće institucije sa nivoa entiteta, kantona i Distrikta Brčko BiH.

(2) U komunikaciji sa Evropskom komisijom i drugim institucijama Evropske unije, te Delegacijom Evropske unije u BiH, isključivo sadržaj koji je prethodno usaglašen u okviru sistema koordinacije procesa evropskih integracija u BiH može biti predstavljen kao jedinstven stav ispred BiH.

Član 13.

(Komunikacija između institucija BiH, entiteta, kantona i Distrikta Brčko BiH u procesu evropskih integracija)

(1) Komunikacija između institucija Bosne i Hercegovine, entiteta, kantona i Distrikta Brčko BiH u oblasti evropskih integracija ostvarivaće se isključivo na način definisan ovom odlukom, uz potpuno uvažavanje principa i rješenja koja su u njoj sadržana.

(2) Predstavnici institucija Bosne i Hercegovine, entiteta, kantona i iz Brčko Distrikta BiH u tijelima sistema koordinacije u oblasti evropskih integracija u BiH, te, posebno, koordinirajuće institucije u oblasti evropskih integracija sa nivoa Bosne i Hercegovine, entiteta, kantona i iz Brčko Distrikta, obavezni su da

ostvaruju intenzivnu i transparentnu komunikaciju i saradnju u cilju olakšavanja blagovremenog i efikasnog ispunjavanja obaveza Bosne i Hercegovine u procesu pridruživanja, odnosno pristupanja Europskoj uniji.

(3) Komunikacija između institucija Bosne i Hercegovine, entiteta, kantona i iz Distrikta Brčko BiH provodiće se u skladu sa rješenjima ove odluke, te uvažavajući modalitete i principe horizontalne koordinacije u okviru svakog nivoa vlasti u BiH, a koji, u skladu sa članom 2. (3) Odluke, ne predstavljaju predmet njenog regulisanja.

POGLAVLJE VIII – PRELAZNE I ZAVRŠNE ODREDBE

Član 14.
(Stavljanje propisa van snage)

Član 15.
(Stupanje na snagu)

zurnal.info